

REGLUR

um ráðstöfun á verðmiðlunarfé til hagræðingaraðgerða í mjólkuriðnaði og mjólkurframleiðslu.

1. gr.

Ráðstöfun verðmiðlunarffjár.

Heimilt er að ráðstafa allt að 450 milljónum kr. af verðmiðlunarfé, sem innheimt var af innveginni mjólk fyrir 1. janúar 1994, svo og vaxtatekjum af því fé, til úreldingar mjólkurbúa, hagræðingarverkefna hjá mjólkurbúum og til búháttarbreytinga á jörðum með mjólkurframleiðslu sem liggja fjarri afurðastöð, samkvæmt nánari ákvæðum í reglum þessum.

2. gr.

Úrelding mjólkurbúa.

Fram til 1. desember 1995 getur stjórn mjólkurbús sótt um styrk til úreldingar mjólkurbúsins, með eftirtöldum skilyrðum:

1. Mjólkurbúið verði úrelt í heild og tryggt verði að eignin verði ekki tekin aftur í notkun til mjólkurvinnslu. Kvöð þar um skal þinglýst á viðkomandi fasteign.
2. Berist umsókn fyrir 1. desember 1994 getur styrkur orðið allt að 100% af bókfærðu verði fasteigna og véla.
3. Berist umsókn á tímabilinu frá 1. desember 1994 til 1. desember 1995 getur styrkur orðið allt að 80% af bókfærðu verði fasteigna og véla.

Þegar heimild landbúnaðarráðherra um að úrelða mjólkurbú liggur fyrir skal greiða styrk af verðmiðlunarfé fyrir eignir sem teknar eru til úreldingar. Styrkur skal nema hlutfalli skv. 2. eða 3. tl. af bókfærðu verði þeirra eigna, sem teknar eru úr notkun eins og þær voru skráðar í lok síðasta heila rekstrarárs sem mjólkurbúið starfaði að fullu. Heimilt er að endurmeta eignir til þess að samræma afskriftir, hafi mismunandi aðferðir verið notaðar.

Þær eignir sem teknar eru til úreldingar eru fasteignir og sérhæfður búnaður til mjólkurvinnslu. Lóð telst ekki til fasteignar í þessu sambandi. Bifreiðar teljast ekki til sérhæfðs búnaðar. Sé unnt að selja eignirnar til annarra nota, er heimilt að draga frá hálf töluloverð þeirra, að frádregnum sölukostnaði. Nefnd skv. 5. gr. skal láta leita eftir almennum tilboðum í viðkomandi eignir. Styrkur til úreldingar er ekki greiddur mjólkurbúi, sem er í greiðslustöðvun eða hefur verið tekið til gjaldþrotaskipta.

3. gr.

Hagræðing í mjólkuriðnaði.

Heimilt er að greiða styrki til mjólkurbúa vegna sérstakra verkefna til hagræðingar í mjólkuriðnaði. Heimilt er að styrkja samstarfsverkefni mjólkurbúa eða samruna. Styrkur má ná til sérhæfðs búnaðar til mjólkurvinnslu skv. ákvæðum 2. gr., sem verður óþarfur vegna samstarfsins og til kaupa á nýjum búnaði sem er nauðsynlegur við framkvæmdina.

Með styrkumsókn frá stjórn mjólkurbús skal fylgja áætlun um áformaða hagræðingu í rekstri sem sýni fram á að reikna megi með sparnaði er nemi á fimm ára tímabili eigi lægri fjárhæð en umbeðinni fjárhæð.

Nefnd skv. 5. gr. leggur mat á framkomnar umsóknir. Þegar heimild landbúnaðarráðherra um styrk til hagræðingar liggur fyrir skal greiða hann til viðkomandi mjólkurbúa, enda sé staðfest af trúnaðarmanni Framleiðsluráðs landbúnaðarins að hagræðingaraðgerðum hafi verið komið á.

4. gr.

*Sýrkir til búháttabreytinga
hjá bændum með mjólkurframleiðslu.*

Fram til 1. september 1995 geta eigendur og ábúendur á lögbýlum, sem liggja fjarri afurðastöð eða eru úrleiðis sótt um styrk til úreldingar á aðstöðu til mjólkurframleiðslu á lögbýlum, enda séu uppfyllt eftirfarandi skilyrði:

a. Staðsetning lögbýlis (lögbýla) lengi flutninga a.m.k. um 20 km að meðaltali miðað við verðlagsgrundvallarbú. Heimilt er að víkja frá þessari reglu í tilvikum þar sem flutningar eru erfiðir og dýrir.

b. Styrkur til úreldingar skal ná til fasteigna (fjöss og hlöðu) sem nýttar hafa verið til mjólkurframleiðslu og vélbúnaðar í þeim. Styrkur skal nema matsverði eigna og véla, sem metnar skulu eftir sömu reglum og greiðslur til leiguliða við ábúðarlok. Við úreldingu skal greiðslumark til mjólkurframleiðslu falla niður og er heimilt að bæta niðurfellinguna til að eðlilegar bætur komi fyrir þann aðstöðumissi sem verður til framleiðslu á jörðinni.

c. Tryggt verði að mjólkurframleiðsla verði ekki tekin upp á lögbýlinu fyrir 1. september 1998, nema með leyfi landbúnaðarráðherra. Kvöð þar um skal þinglýst á viðkomandi lögbýli.

Ákvæði þessarar greinar geta einnig tekið til lögbýla sem verða úrleiðis við úreldingu mjólkurbús. Umsóknir bænda um styrki til úreldingar skal taka til afgreiðslu í þeirri röð sem þær berast. Ekki er skylt að verða við umsóknum sem berast eftir að fé þrýtur sem til ráðstöfunar er skv. ákvæðum 1. gr.

5. gr.

Verkefnisnefnd.

Landbúnaðarráðherra skipar fjögurra manna nefnd sem metur umsóknir um styrki skv. reglum þessum. Skal einn nefndarmaður skipaður eftir sameiginlegri tilnefningu ASÍ og BSRB, einn eftir tillögu Samtaka afurðastöðva í mjólkuriðnaði, einn eftir tillögu Stéttarsambands bænda og einn án tilnefningar og er hann jafnframt formaður nefndarinnar.

6. gr.

Reglur þessar eru settar í samræmi við tölulið C í ákvæði til bráðabirgða með lögum nr. 99/1993 um framleiðslu, verðlagningu og sölu á búvörum, með síðari breytingum og öðlast þegar gildi og gilda til 1. janúar 1996.

Landbúnaðarráðuneytið, 22. apríl 1994.

Halldór Blöndal.

Jón Höskuldsson.

AUGLÝSING

um staðfestingu á aðalskipulagi Grindavíkur 1983-2003.

Samkvæmt skipulagslögum nr. 19, 21. maí 1964 hefur ráðherra þann 25. apríl 1994 staðfest breytingu á aðalskipulagi Grindavíkur 1983-2003.

Breytingarnar eru:

- Lóðir fyrir opinberar stofnanir að Víkurbraut 42 og Borgarhrauni 6 verða íbúðalóðir.
- Í stað lóðar fyrir verslun og þjónustu að Víkurbraut 62 verði notkun blönduð, þ.e.a.s. fyrir opinberar stofnanir/verslun og þjónusta.